

**СЛУЖБА СВЯЩЕННОМУЧЕНИКУ ЛАВРЕНТИЮ, ЕПИСКОПУ
БАЛАХНИНСКОМУ, ВИКАРИЮ НИЖЕГОРОДСКОЙ ЕПАРХИИ
И ИЖЕ С НИМ ПОСТРАДАВШИМ ЗА ХРИСТА ПРОТОИЕРЕЮ
АЛЕКСИЮ (ПОРФИРЬЕВУ) и АЛЕКСИЮ (НЕЙДГАРДТУ),
НОВОМУЧЕНИКАМ НИЖЕГОРОДСКИМ.
И ИКОНЫ ПРЕСВЯТОЙ БОГОРОДИЦЫ «ВСЕХ СКОРБЯЩИХ
РАДОСТЬ»**

**в соединении
(6 ноября н.ст.)**

На велицей вечерни

Блажен муж: на Господи, воззвах 8: стихиры Богородицы, глас 2:

Всем предста́тельствуеши, Благая,/ прибега́ющим с верою в
держа́вный Твой покров:/ иного бо не ймамы грешнии к Богу в бедах и
скорбех прісно избавления,/ обременени грехи многими,/ Мати Бога
Вышняго./ Темже Ти припадаем:/ избави от всякаго обстоящая рабы Твоя.

Всех скорбящих Радосте,/ и обидимых Заступнице,/ и алчущих
Питательнице,/ странных утешение,/ обуреваемых пристанище,/ больных
посещение,/ немощных покрове и Заступнице,/ жéзле старости,/ Мати
Бога Вышняго Ты еси, Пречистая:/ потщися, молимся, спастися рабом
Твоим.

Глас 4:

Радуйся, Богомати Пречистая;/ радуйся, верным надеждо;/ радуйся,
миру очищение;/ радуйся, избавляющая от всяких скорбей рабы Твоя;/
радуйся, пристанище обуреваемым;/ радуйся, всемирный свете;/ радуйся,
Утешительнице и Заступнице христиан;/ радуйся, прибежище и спасение
всех блажащих Тя, Богоневесто.

Радуйся, доброто Иаковля,/ Юже избра́ Бог, Юже возлюби,/ дверь
спасаемых, клятвы разрешение, Всеблагословенная,/ чрево
Боговместимое, падших возведение,/ святейшая Херувим и тварей
преиму́щая,/ огнезrachный Престоле Владычний,/ всемирная радости и
славо,/ колеснице Слова, облаче, из негоже возсия Солнце,/ сущим во
тьме подая велию милость.

Святым, глас 1-й:

Придите утешимся, вернии, / скорбь бо преста, / возсия солнца
светлее мучеников всечестных память, / ихже кровьюми убелилася Русь / в

настоящее малое время // покаяния плод принесе.

О дивное чудо Спасителя нашего, / скорбь убо в радость прелагается
Им, / слезные источники, яко реки текущие в жизнь вечную бывают, /
сшедшии на Волжский остров взошли в небесный Иерусалим, // осенняя
память мучеников вечную весну предвозвещает.

Не убоимся, братие, от убивающих тело, / души же не могущих
погубити, / призывает наш Архипастырь святой Лаврентий, / не остави бо
паству свою / и был верен до смерти // и наследова от Владыки венеч
живота.

О старцы Печерстии! / Мирным вашим трудам и блаженной тихой
кончине / како новый Наместник обители святой Лаврентий не
поревновал, / в предлежащем подвиге исповедничества, // иной бо крест
ему Господь Иисус даровал.

СЛАВА, глас 8-й:

Имеет убо Божественная душа твоя и непорочная, / приснопамятне
Лаврентие, / Небесный Иерусалим жилище, / егоже стены пречистыма
рукама Невидимаго Бога живописашася, / Всечестное же твое тело / яко в
чаще во брегах Волжских под обителью твоею Печерскою упокоилося, /
утверждение ей подавая, / и сокровище неоскудеваемо спасения земли
нашей Нижегородстей обильно источающе. / Соблюди, всехвальне, ты
величающий град от противных приражений, / дерзновение яко имея ко
Христу, ты прославльшему.

И НЫНЕ, Богородичен, глас 6

Приидите, празднoлюбных собори,/ святую Деву Богоотроковицу
ублажим:/ радости бо и спасения Ходатаица бысть мiрови,/ яко рождавшая
Христа Бога./ Сию бо Отец Пребезначальный,/ от всех родов едину
избранную, Дщерь Себе именова; / Сын Собезначальный и
Соприсносущный в Матерь избра; / Дух же Святой яко Пречистую
Невесту Себе Боголепно сочета./ Сию яко Богоизбранную и
Благословенную в женах/ Вышния силы немолчными песньми величают,/
Гавриила имуща Чиноначальника:/ Благодатная, радуйся, с Тобою
Господь./ Сию патриарси, пророцы и вси святии/ со пророком Давидом
радостными гласы венчают:/ предста Царица одесную Тебе, Владыко,/
рысны златыми одеяна/ и преукрашена Божественными благолепотами./
Сию, яко державную Заступницу рода нашего,/ и мы, недостойнии,
воспоим, глаголюще:/ радуйся, Церкви чудное украшение/ и всему миру
предивный покрове;/ радуйся, похвало и радости всех земнородных;/

радуйся, Божественное утешение всех скорбящих и обидимых;/ радуйся, Обрадованная, с Тобою Господь,/ подавай мірови Тобою велию милость.

Вход. Свете тихий. Прокимен. Чтения Богородице 3, Святым 3

Богородице 1. Бытія чтѣние.

Изыйде Иаков от студенца клятвеннаго и иде в Харранъ. И обрете место, и спа тамо: зайде бо солнце, и взят от камня места того, и положи возглавие себе, и спа на месте оном. И сон виде. И се лествица, утверждена на земли, еяже глава досязаше до небес, и Ангели Божии восходяху и низходяху по ней. Господь же утверждашеся на ней и рече: Аз Бог Авраамов, отца твоего, и Бог Исааков, не бойся: земля, идеже ты спиши на ней, тебе дам ю и семени твоему. И будет семя твоё, яко песок земный, и распространится на море, и ливу, и север, и на восток; и возблагодарятся о тебе вся колена земная и о семени твоём. И се Аз с тобою, сохраняяй тя на всяком пути, а може аще пойдёши. И возвращу тя в землю сию, яко не имам тебе оставить, дондеже сотворити Ми вся, елика глаголах тебе. И воста Иаков от сна своего, и рече: яко есть Господь на месте сем, аз же не ведах. И убояся, и рече: яко страшно место сие; несть сие, но дом Божий и сия врата Небесная.

2. Пророчества Иезекиилева чтѣние.

Тако глаголет Господь: будет от дне осмаго и прочее, сотворят иереи на олтари всесожжения вашего и яже спасения вашего, и приму вы, глаголет Адонай Господь. И обрати мя на путь врат святых внешних, зрящих на восток, и сия бяху затворена. И рече Господь ко мне: врата сия затворена будут и не отверзнутся, и никтоже пройдёт сквозь их; яко Господь Бог Израилев пройдёт ими, и будут затворена. Яко игумен сядет в них снести хлеб, по пути Еламских врат вйдёт и по пути его изыдет. И введё мя по пути врат святых, сущих к северу, прямо храму, и видех, и се исполнь славы храм Господень.

3. Притчей чтѣние.

Премудрость созда Себе дом и утверди столпов семь. Закла Своя жертвенная, и растворил в чаши Своей вино, и уготова Свою трапезу. Посла Своя рабы, созываючи с высоким проповеданием на чашу, глаголющи: иже есть безумен, да уклонится ко Мне. И требующим ума рече: приидите, ядите Мой хлеб, и пейте вино, еже растворих вам.

Оста́вите безúмие, и жи́ви бу́дете, и взыщ́ите ра́зума, да поживе́те и испра́вите ра́зум в ве́дении. Наказу́яй злы́я, при́имет себе́ безче́стие; облича́яй же нечест́иваго, опорóчит себе́, обличе́ние бо нечест́ивому ра́ны е́му. Не облича́й злых, да не возненави́дят тебе́. Облича́й премúдра, и возлю́бит тя. Дажь премúдрому винú, и премúдрший бу́дет. Сказу́й пра́ведному, и прилож́ит приима́ти. Нача́ло премúдрости страх Господень и совет́ святых́ ра́зум. Разуме́ти бо за́кон по́мысла есть́ благо́го. Сим бо о́бразом мно́гое поживе́ши вре́мя, и прилож́атся тебе́ ле́та живота́.

Святым Де́яний святых́ апóстол чтéние (глава́ 4):

Во дни о́ны, глаго́лющим же апóстолом к лю́дем,/ наидо́ша на них священ́ницы и воево́да церко́вный, и саддукéи,/ жа́ляще си, за е́же учи́ти им лю́ди и возвещ́ати о Иису́се воскресе́ние ме́ртвых;/ и возложи́ша на них ру́ки и положи́ша их в соблюде́ние до у́трия:/ бе бо ве́чер уже́./ Мнóзи же от слы́шавших сло́во ве́роваша:/ и бысть числó мужей́ я́ко ты́сящ пять́./ Бысть же наут́рие собра́тися князе́м их, и ста́рцем, и кни́жником во Иерусали́м:/ и А́нне архиере́ю, и Каиа́фе, и Иоáнну, и Алексáндру,/ и ели́цы бе́ша от ро́да архиере́йска./ И, поста́вльше их посреде́, вопроша́ху:/ ко́ею си́лою, или́ ко́им и́менем сотвори́сте сие́ вы?/ Тогда́ Петр, испо́лнися Ду́ха Свя́та, рече́ к ним:/ кня́зи лю́дстии и ста́рцы Изра́илевы,/ а́ще мы днесь истязу́еми есмы́ о благоде́янии челове́ка немо́щна,/ о чесóм сей спасе́ся,/ разу́мно бу́ди всем вам и всем лю́дем Изра́иловым,/ я́ко во и́мя Иису́са Христа́ Назоре́я,/ Егóже вы распя́сте,/ Егóже Бог воскресí от ме́ртвых,/ о Сем сей стои́т пред ва́ми здрав./ Сей есть́ ка́мень, укорéнный от вас, зи́ждущих,/ бы́вый во главú у́гла,/ и несть ни о еди́ном же ино́м спасе́ния;/ несть бо ино́го и́мене под небесéм, да́ннаго в челове́цех,/ о нёмже подобáет спаст́ися нам.

Де́яний святых́ апóстол чтéние (глава́ 4):

Во дни о́ны, ви́дяще иудéи Петро́во дерзнове́ние и Иоáнново и разумéвше,/ я́ко челове́ка неkníжна еста́ и прóста, дивля́хуся,/ зна́ху же их, я́ко со Иису́сом бе́ста;/ ви́дяще же исцелéвшаго челове́ка с нима́ стоя́ща,/ ничто́же имя́ху проти́ву рещи́./ Повелéвше же има́ вон из со́нмища изы́ти,/ стязáхуся ко друг дру́гу, глаго́люще:/ что сотвори́м челове́кома сима́?/ Я́ко у́бо на́рочитое зна́мение бысть има́,/ всем живу́щим во Иерусали́ме я́ве,/ и не мо́жем отрещи́ся;/ но да не бо́лее простре́тся в лю́дех,/ прещéнием да запрети́м има́ ктому́ не глаго́лати о

імени сем ни єдиному от человек./ И призавше их,/ заповѣдаша іма
отнюдь не провещавати, ниже учѣти о імени Иисуса./ Петр же и
Иоанн, отвѣщавше к ним, рѣста:/ аще праведно есть пред Богом/ вас
послушати паче, нежели Бога?/ Судите: не можем бо мы, яже видехом и
слышахом, не глаголати./ Онѣ же, призапрѣщше іма, пустиша я,/ ничтоже
обрѣтше, како мучити их, людей ради,/ яко вси прославляху Бога о
бывшем:/ лет бо быше множае чѣтыредесяти человек той,/ на немже бысть
чудо сие исцеления.

Деяний святых апостол чтение (глава 4):

Во дни оны, отпущена бывша апостола приидоста ко своим и
возвестиста,/ елика к нима архиереи и старцы рѣша./ Онѣ же, слышавше,
единодушно воздвигоша глас к Богу и рекоша:/ Владыко, Ты, Боже,
сотворивый небо и землю и море и вся, яже в них,/ Иже усты Давида,
отрока Твоего, рече:/ вскую шаташася языцы и людие поучишася
тщетным?/ Предсташа цари земстии,/ и князи собрашася вкупе на
Господа и на Христа Его./ Собрашася бо воистину во граде сем на святого
Отрока Твоего Иисуса,/ Егоже помазал еси,/ Ирод же и Понтийский
Пилат, с языки и людьми израилевыми,/ сотворити, елика рука Твоя и
совет Твой предначерче быти./ И ныне, Господи, призри на прещения их/ и
даждь рабом Твоим со всяким дерзновением глаголати слово Твое,/
внегда руку Твою прострѣти Ти во исцеления,/ и знаменiem и чудесем
бывати именем святым Отрока Твоего Иисуса./ И помолвившимся им,
подвижеся место, идеже бяху собрани,/ и исполнишася вси Духа Свята,/ и
глаголаху слово Божие со дерзновением.

На литии стихира Богородице, глас 8:

Предстательнице верных, Богородительнице,/ скорбящих Радосте и
плачущих великое утешение,/ моли Сына Твоего, Христа Бога нашего,/ со
Ангелы, и Апостолы, и всеми святыми/ избавити нас в час испытания
лютая осуждения,/ да Тобою спасение улучивше,/ во веки славим Тя,
Преблагословенную.

Святым, глас 8-й:

Поругание Христово носящее, святителю Лаврентие, / с кафедры
епископской в темницу сошел еси; / поношение всяческое терпяще, / с
соузники твоими смерти мученической предан был еси. / Любимче
народа, добровольно страдая, / царственным страстотерпцам и Самому

Спасителю уподобился еси. / Молитва же ваша, святии Лаврентие, Алексие и Алексие, // земли нашей Нижегородстей довлеет на небеси.

СТИХИРЫ НА СТИХОВНЕ, глас 1-й:

Веселися о Господе, Нижний Новгороде, / радуйся и ликуй верою светлоодеявша, / Архипастыря имея Лаврентия всеславного страдальца / и, по основателе твоём святем мученике князе Георгии, / такожде пред Богом заступника и поборника, / и свидетеля Истины яко велие сокровище. / Виждь низлагающа иноплеменников дерзости / и благодарно Спасу возопий: Господи, слава Тебе.

СТИХ: Священницы Твои облекутся в правду, / и преподобнии Твои возрадуются.

Аще призвал есть верных к мученичеству, / к подлежащему исповедничеству, / предлежит бо нам ныне во благохваление святителя Лаврентий, / ибо званный к трапезе Агнчей усердно прииде / и, мученическими кровьюми убелившись, исповедал Христа, / / Ему же молится о спасении душ наших

СТИХ: В память вечную будет праведник, / от слуха зла не убоится.

В премирная селения дух твой, святителю Лаврентие мудре, / Христос Бог положи непреложно, / ты бо веры Православных был еси поборник / и в годину гонения мужески пострадал, яко адамант твердый; / темже твое днесь празднуем успение по достоянию, // славяще прославльшаго тя Господа.

СЛАВА, святым, глас 5-й:

Стецемся верою и любовью, / возопиим празднственная и воспещим руками вси, / воинства Небесная да веселятся / в настоящее торжество священикомучеников, / убиенных за Прободенного копием Царя Господа / и гордыню богоборцев низложивших дерзновенно, / со всеми святыми наших твердых поборников в Новаграде Нижнем, / молящися сице рцем, / преславне Лаврентие, Алексие и Алексие, / предварите и измите ны от всякия нужды / и спасите рабы ваша молитвами вашими.

И ныне, Богородице, глас 4:

Прізри на моления Твоих раб, Всенепорочная, / утоляючи лютая на ны востания, / всякия скорби нас изменяючи: / Тя бо едину, твердое и известное утверждение, имамы / и Твое предстательство стяж́ахом, / да не постыдимся, Владычице, Тя призывающих. / Потщися на умоление Тебе

верно вопиющих:/ радуйся, Владычице, всех помощи, радости и покрове,
и спасение душ наших.

Тропарь Богородице, глас 2:

**Всех скорбящих Радосте,/ и обидимых Заступнице,/ и алчущих
Питательнице,/ странных утешение,/ обуреваемых пристанище,
больных посещение,/ немощных покрове и Заступнице,/ жёзле
старости,/ Мати Бога Вышняго Ты еси, Пречистая:/ потщися,
молимся, спастися рабом Твоим.**

Тропарь свящмч. Лаврентию, глас 4-й.

**Святительства благодатью украшенный, / ни на един же день
оставити паству свою восхотел еси, / юже вручи тебе
Пастыреначальник Христос, / Емуже до уз темничных и смерти, взял
крест, последовал еси, / венцем мученическим на небесах венчался
еси, / священномучениче Лаврентие отче наш, // моли Христа Бога
спастися душам нашим.**

Тропа́рь свящмч. Алексею и мч. Алексею, глас 3:

**Цёркве Рýсския столпи непоколеб́имии,/ благоче́стия пра́вило,
жити́я ева́нгельскаго о́бразе,/ священномúчениче Алексие и мучениче
Алексие,/ Христа́ ра́ди пострада́вший да́же до кро́ве,/ Егóже моли́те
усе́рдно,/ я́ко Нача́льника и Соверши́теля спасе́ния,/ Русь Святúю
утверди́ти в Правосла́вии// до сконча́ния ве́ка.**

НА УТРЕНИ ПО ПЕРВОМ СТИХОСЛОВИИ

СЕДАЛЕН, ГЛАС 4-й

**Лаврентия днесь священномученика память светло празднуем, яко
Христу непрестанно молящася, всем дати мир и велию милость.**

СЛАВА И НЫНЕ, Богородичен, глас 5-й:

**Утоли́ болезни многовоздыхающия души моя, / утолившая вся́ку
слезу от лица земли:/ Ты бо человеков болезни отгоняеши / и грешных
скорби разрешаеши, / Тебе бо вси стяжа́хом надежду и утверждение, /
Пресвятая Мати Дево.**

На полиелеи величание:

**Достойно есть величати Тя,/ Богородице,/ честнейшую Херувим/
и славнейшую/ без сравнения Серафим.**

**Велича́ем вас,/ свяще́нномуче́ницы Лавре́нтие, Алексе́е и
муче́ниче Алексе́е,/ и чтим че́стна́я страда́ния ваша,/ я́же за Христа́
во утве́ржде́ние на Руси́ Правосла́вия// прете́рпи́ли есте.**

ПО ПОЛИЕЛЕЕ СЕДАЛЕН, глас 8-й:

Подобно царственным страстотерпцам / мощми срастворен всей
земли Русской почиваеши, / духом же скорый помощник обретаешися / и
чудесами яко лучами солнечными блистаешися, / и уставляеши недуги, и
души веселиши, и вся просвещаеши, / темже ты всеблаженне по долгу
поем и любовью почитаем святую память твою / свящennemучениче
Лаврентие, / моли Христа Бога согрешений оставление // даровати
чтущим любовь святую память твою.

СЛАВА И НЫНЕ, Богородичен, глас 6-й:

Преложение скорбящих,/ пременение болящих еси, Богородице
Всепетая:/ спаси град Твой и люди,/ бо́ри́мых умирение, обуреваемых
тишино,/ едина Предстательнице верных.

ПО 50-м ПСАЛМЕ

Слава/ молитвами свящennemучеников Лаврентия, Алексия и мученика
Алексия,/...

И ныне/ Молитвами Богородицы.. Помилуй мя...

Днесь созывает страстотерпцев всемирное торжество, / приидите убо
празднолюбцы, / светло празднуем память их, глаголюще: / радуйтесь, на
защиту риз Господних по долгу ставшие, / радуйтесь, отпор гонителем и
хульником Святыя Церкви давшие, / радуйтесь, низложение и темничное
заключение по образу Спасителю претерпевшие, / радуйся, Лаврентие,
блаженную страсть Христову возживописавый; / Егоже молитве,
свящennemученицы Лаврентие, Алексе́е и мучени́че Алексе́е, /
избавитися нам видимых и невидимых враг // и спастися душам нашим.

КАНОН на 8:

Богородице, свящмч. Лаврентию, свящмч. Алексею, мч. Алексею

ПЕСНЬ 1

Ирмос: Отвѣрзу уста моя,/ и наполнятся Духа,/ и слово отрѣгну Царице Матери,/ и явлюся, светло торжествуя,/ и воспою, радуясь, Тоя чудеса.

Пресвятая Богородице, спаси нас.

Кую Ти достойную песнь принесет наше неможение,/ точию обрадовательную, ейже нас Гавриил тайно научил есть:/ радуйся, Богородице Дево, Мати Невестная.

Пресвятая Богородице, спаси нас.

Моря житейскаго волнами потопляем и напастями лютыми одержим,/ ко пристанищу устремихся невлаѣмому, покрову Твоему:/ темже мя избави, Богородице, от лютых.

Священномучениче Лаврентие, моли Бога о нас.

Егда от рождшей ты взят был еси на воспитание в училище духовное, не чаяло ли сердце матери скорби и болезни твои, их же имел бысть претерпети за Христа, славне Евгение.

Священномучениче Лаврентие, моли Бога о нас.

Уподобил тя Христос Себе и предъизбрал даже из детства в единственном сыне матери - вдовицы, приуготовляя сосуд избранный святительства Своего.

Священномучениче Алексие, моли Бога о нас.

Воли Божией послушлив быв,/ священства дар приял еси, священномучениче Алексие,/ и, за Христа даже до смерти пострадав,/ верный сын Церкви явился еси.

Священномучениче Алексие, моли Бога о нас.

Изгнание и разлучение с паствою твоєю мужественно претерпел еси, священномучениче Алексие,/ но ничтоже возможе разлучити тя от любви Божия.

Святой мучениче Алексие, моли Бога о нас.

Крѣвными мучѣнии вшел еси в Небѣсная селѣния, Алексие славне,/ якоже дрѣвле Израиль в зѣмлю обетованную, фараѡном гонимь./ Ныне же, Престолу Святыя Троицы предстоя,/ моли о чтущих святую память твою.

Святый мучениче Алексие, моли Бога о нас.

Рúсския Цёркве сыне вёрный Алексие, и страдальче изрядный,/ ты сквозé огонь и вóду мучéний побéдно прошёл есý./ Тёмже и Госпóдь Мучениколýбец уготóва ти покой вéчный.

Катавасия: Отверзу уста..

ПЕСНЬ 3

Ирмос: Твоя песнословцы, Богородице,/ живой и независтный источниче,/ лик себе совокúплшия, духовно утверди/ в Божественней Твоей славе,/ венцев славы сподоби.

Пресвятая Богородице, спаси нас.

Утверждение буди, и прибежище, и покров, Дево Богородительнице,/ верою к Тебе прибегающим и Божию Тя Матерь исповéдающим.

Пресвятая Богородице, спаси нас.

Ты еси земнородных упование, и помощь, и радость, покров и прибежище, Владычице, Мати Живота./ Темже Тя молим: Твою помощь низпослй всем поющим Тя, Пречистая.

Священномучениче Лаврентие, моли Бога о нас.

Дивны дела Твои, Господи, колико души, Тебе преданные, возрастают и совершенствуются, зело возростал духовне отрок Евгений, угодник Твой его же святыми молитвами спаси души наша.

Священномучениче Лаврентие, моли Бога о нас.

Витии суемудренные недоумеют, како муж, благоугоден Господеви, вся, елика аще творит, успеет, но целомудрен быв, в научении, во всем преуспевал угодник Христов Евгений.

Священномучениче Алексие, моли Бога о нас.

Егда прийде испытáние вéры твоея, священномúчениче Алексие,/ страдáние за Христа, я́ко благодáтный дар, при́ял есý/ и крóвию твоёю Рúсскую зéмлю обагрíл есý.

Священномучениче Алексие, моли Бога о нас.

Егда прииде гонение от безбожных,/ столп непоколебим Русския
Церкве явился еси, священномучениче Алексие,/ святых, яко ближних
сродник, в помощь призывая,/ с нимиже купно ныне прославляешися.

Святой мучениче Алексие, моли Бога о нас.

Праведных души в руке Божией и не прикоснется их мука,/ сею
надеждою укрепляемь, Алексие крепкодушне,/ телесная страдания
мужественно терпел еси.

Святой мучениче Алексие, моли Бога о нас.

Одеваясь силою крестною,/ противостал еси, Алексие, проливающим
кровь неповинную/ и не убоялся еси истину возвестити врагом Церкви
Христовы.

КОНДАК священмч. Лаврентию, глас 3-й:

В годину трудную и скорбную крест свой не оставляя нес, / егоже
вручи тебе Пастыреначальник Христос, / Ему же до темницы и
смерти последовал еси, / венцем мученическим на небесах венчался
еси, / Священномучениче Лаврентие отче наш, / молися Пресвятой
Троице / паству Нижегородскую в правоверии соблюсти // и обитель
твою Печерскую сохранить даже до скончания века.

ИКОС

Благословением венценоснаго страстотерпца, славне Лаврентие, было
твое поставление, / и дондеже сия последняя царского времени
архиерейская хиротония совершися не пришло на Руси отступление, /
верен убо Господь с наказанием сотворити избытие, / последнего яко
перваго принимая тя священномучениче, / труды же и подвиг твой
полагая во основание покаяния народа Божия.

Кондак священмч. Алексею и мученику Алексею, глас 2:

Восхвалим, вернии,/ изряднаго во священницех Алексиа/ и
славнаго в мученицех Алексиа,/ Православия поборников и
благочестия ревнителей,/ земли Русския красное прозябение,/ иже
страданием Небесé достиже/ и тамо тепле молят Христа Бóга//
спасти́ся душáм нáшим.

Їкос:

Красуйся и ликуй, Цѣрковь Рѹсская,/ яко благоплѣдныя лозы
священныхъ страдальцевъ израстившая,/ добропобѣднымъ мучѣниемъ сердца
вѣрныхъ укрепившихъ,/ заповѣди Господни исполнившихъ и прѣсно
евангельски учившихъ:/ приидите, чада, послушайте мене,/ не убойтесь отъ
убивающихъ тѣло, души же не могущихъ убить,/ убойтесь же паче
могущаго душу и тѣло погубить в геѣнне./ Тѣмже, священномучениче
Алексие и мучениче Алексие, молите Христа Бога спастися душамъ
нашимъ.

Седален, глас 3:

Завѣты исповѣдниковъ и священномучениковъ Христовыхъ
восприѣмшии,/ души ваша за вѣру Православную положили есте, святѣи,/
ѣюже утверждается земля Рѹсская./ Сего ради молитесь,
священномученицы Лаврентіе, Алексие и мучениче Алексие,/ любовію
чтущимъ васъ вѣрнымъ Христу до конца быти.

Слава, и ныне, Богородице:

Радуйся, Солнца облаче мысленнаго и неизреченнаго, Владычице;/
радуйся, всесветлая свещѣ; радуйся, свѣщнице всезлатый;/ Тобою,
Пресвятая, Ева избавися отъ клятвы./ Но яко имущая дерзновение ко
Благовременному Сыну Твоему и Богу,/ матернею молитвою не оскудей о
насъ молиться, Пречистая.

ПЕСНЬ 4

Ирмос: Седяй в славе на Престолѣ Божества,/ во облацѣхъ легце/ прииде
Иисусъ Пребожественный/ нетленную дланию и спасе зовущія:/ слава,
Христе, силѣ Твоей.

Пресвятая Богородице, спаси насъ.

Надеждо ненадежныхъ, помощнице сирыхъ,/ плачущихъ утѣшение,
согрѣшающихъ очищение,/ Руководительнице заблудшихъ, болящихъ
Целѣбнице и исправление падающихъ,/ Владычице, спаси рабы Твоя.

Пресвятая Богородице, спаси насъ.

От великих и различных прегрешений же и напастей всегда спасаеши мя;/ темже Тя яко рождшую Господа молю/ и к Тебе прибегаю, непобедимей по́мощи скорбящим:/ от бед изведи мольбами Твоими.

Священномучениче Лаврентие, моли Бога о нас.

Монашеский путь искусом начинается, им же, яко злато в горниле, душа твоя очищалася, но помози, отче Лаврентие, и нам претерпети искус коемуждо свой.

Священномучениче Лаврентие, моли Бога о нас.

От послушания к послушанию восходил еси, отче Лаврентие, но помози и нам немощным, от Божественныя Силы восприняв силу, повеленное исполнити и течение совершити свое.

Священномучениче Алексие, моли Бога о нас.

Да не дерза́ют язы́цы рещи́: где есть Бог ваш?/ Кровь бо новому́чеников от земли́ на́шей вопи́ет:/ Го́споди, Госпо́дь наш, я́ко чу́дно и́мя Твое́ по всей Ру́сстей земли́.

Священномучениче Алексие, моли Бога о нас.

И́мже о́бразом жела́ет елѣнь на исто́чники водны́я,/ си́це ты, страстоте́рпче Алексие, к живонóсным страда́нием за Христа́ прите́кл еси́,/ и́миже при́сно свяще́нно обновля́ется лице́ земли́ Ру́сския.

Святый мучениче Алексие, моли Бога о нас.

Егда́ смяте́ся земля́ Ру́сская,/ ты, страда́льче Алексие, я́ко добр во́ин Христовъ,/ терпе́нием поте́кл еси́ на предше́жащий по́двиг/ и, багряни́цею крове́й оде́ваясь,/ му́ченически пострада́л еси́.

Святый мучениче Алексие, моли Бога о нас.

Поне́же в ма́лом ве́рен раб яви́лся еси́, сла́вне,/ Госпо́дь вѣщши́й дар ти вручи́,/ е́же испове́дати пред мучи́тели Бо́га и́стиннаго,/ Егóже ра́ди и пострада́л еси́.

ПЕСНЬ 5

Ирмос: Ужасо́шася всяческая/ о Божественной славе Твоей:/ Ты бо, Неискусобрачная Дево,/ имела еси во утробе над всеми Бога/ и родила еси Безлетнаго Сына,/ всем воспевающим Тя/ мир подавающая.

Пресвятая Богородице, спаси нас.

Ты крепость моя, Ты похвала, и радование, и Хранительница ми еси,/ и заступление, и прибежище, и Предстательница непобедима, Пресвятая Богородице Дево:/ темже спаси раба Твоего.

Пресвятая Богородице, спаси нас.

Добрóту Тя Иаковлю возлюби Бог, Дево Отроковице,/ украшая вся Тобою, омрачившися преступлением пёрвее.

Священномучениче Лаврентие, моли Бога о нас.

Яко послушание монашеское не искавшему священства оное тебе, отче Лаврентие, вверяется, но умоли Господа нам, да взыщем и обретем благодать.

Священномучениче Лаврентие, моли Бога о нас.

Пастырская благодать сама тя, отче Лаврентие, научаше и образоваше, якоже Святы́й Дух в верных своих ходатайствует воздыханиями неизреченными, но помози нам молитвами твоими причастниками быти Его.

Священномучениче Алексие, моли Бога о нас.

Я́ко луч Со́лнца Пра́вды яви́лся еси́, священному́чениче Алексие,/ и страда́ньми твои́ми мглу безбо́жия над Оте́чеством на́шим разсе́ял еси́.

Священномучениче Алексие, моли Бога о нас.

Егда́ безбо́жнии тща́хуся сокры́ти тя в темни́це, священному́чениче Алексие,/ Госпо́дь яви́ тя испове́дника Своего́ всем конце́м земли́ Ру́сския.

Святы́й мучениче Алексие, моли Бога о нас.

Я́ко сын дне, на Не́бо душе́ю твоёю возше́л еси́, страда́льче Алексие,/ и зе́млю Ру́сскую кро́вию твоёю ороси́л еси́./ Сего́ ра́ди Не́бо и земля́ ны́не тя совоку́пно велича́ют.

Святы́й мучениче Алексие, моли Бога о нас.

Ни гонѣние лю́тое, ни ўзы темні́чныя,/ ни рабо́ты го́рькія, ни скорбѣ,
ни теснотá/ возмо́га ты отлучи́ти от любвѣ Бо́жия, мучениче,/ обáче,
Христóм укрепля́емъ, вся препобедѣ́л еси́.

ПЕСНЬ 6

Ирмос: Божественное сие и всесестно́е/ совершающе прáзднество,/ Богóмудрии, Богóматере,/ приидите, руками восплѣ́щем,/ от Нея рожда́гося Бога славим.

Пресвятая Богородице, спаси нас.

Болящих Целительницу, падающих востание, согрешающих очищение, Богородице,/ Тебе молю, со слезами припадаю и зову Ти:/ яко сильна́ Сама мя спаси, погибающаго.

Пресвятая Богородице, спаси нас.

В но́щи и во дни, я́ве и втай под Твой прибегаем кров, Пречистая Дево,/ иже Тя верно славословящи.

Священномучениче Лаврентие, моли Бога о нас.

Приближшуся часу испытанія, святитель Тихон с собором Архiereев в высшую степень священства, во епископа ты, отче Лаврентие, поставляет, пасти агнцы Своя ты Христос призывает, яко воистину любящего Его.

Священномучениче Лаврентие, моли Бога о нас.

Един пред Богом в ответе остался еси за церковь Нижегородскую, отче Лаврентие, егда архиерей правящий остави паству и ты по себе викария, но исправи стопы наша, во еже не оставити путь Христов. С ревностию на дело Божие устремился еси, отче Лаврентие, паству нижегородскую и обитель Печерскую окормляти и словесные овцы ко Христу возвращати, яко из уст львовых исхищая от богоборческаго заблуждения, наследники их ко Христу приводя Божественного Царствия Его.

Священномучениче Алексие, моли Бога о нас.

Восприим меч духо́вный, иже есть глаго́л Бо́жий,/ безбо́жных ко́зни сокруши́л еси́, священномучениче Алексие,/ и вся разжѣ́нныя стрѣлы лука́ваго угаси́л еси́ щито́м вѣры Правосла́вныя.

Священномучениче Алексие, моли Бога о нас.

Во священни́цах благочѣстно пожѣв и мучѣния путь терпѣливо воспрѣим,/ сугубую мзду на Небесѣх обрѣл еси́, священномучениче Алексие,/ иде́же евангѣльски прѣсно радуешися и весели́шися.

Святы́й мучениче Алексие, моли Бога о нас.

Егда́ бу́ря гонѣний одержаше кора́бль Цѣркве Рýсския,/ ты, мучениче, небоя́зненне и неисхо́дне в нем пребы́л еси́,/ имѣя Ко́рмчаго Сама́го Христа́.

Святы́й мучениче Алексие, моли Бога о нас.

Егда́ лю́дие безбо́жнии воста́ша на Цѣрковь Рýсскую,/ ты, терпеливоду́шне, не убо́явся лишѣний,/ вѣрен да́же до смѣрти Христу́ пребы́л еси́.

Кондак Богородице, глас 4:

Не има́мы иныя помощи́,/ не има́мы иныя надежды́,/ разве Тебе́, Владычице./ Ты нам помози́:/ на Тебе́ надее́мся и Тобою хвали́мся,/ Твои́ бо есмы раби́,/ да не посты́димся.

Икос:

Простри́ длáни Твоя́, ими́же всех Влады́ку яко Младенца прия́ла еси́ за мно́жество благо́сти:/ не остави́ нас, всегда́ надеющихся на Тя, бо́дренною Твоею́ молитвою́,/ и неисче́тною просты́нею ущѣ́дри нас,/ и пода́ждь душамъ нашимъ милосердіе Твое́, во ве́ки источа́ющи,/ Тебе́ бо има́мы грѣшнии́ Заступни́цу от находящихъ на ны́ бед и зол./ Но́ яко имущи́ милосердія щед́роты,/ ускори́ на молитву́ и потщи́ся на умо́ление,/ предста́тельствующи́ присно, Богородице, чтущихъ Тя.

ПЕСНЬ 7

Ирмос: Не послужи́ша твари́ Богомудрии́/ паче Созда́вшаго,/ но о́гненное преще́ние муже́ски попра́вше,/ радоваху́ся, поюще́:/ препе́тый отцевъ Госпо́дь и Бог, благослове́н еси́.

Пресвя́тая Богородице, спаси нас.

Страстьми преста́рѣвся и неосла́бными напа́стьми, и скорбѣми/ и, доспев к за́падом жития моего, добродетелем непричастен, ленинстїю снѣдѣн быв,/ вопию Ти, Владычице:/ утешение земным, помилуй мя.

Пресвятая Богородице, спаси нас.

Водворѣхомся в вечер в плачи печалей и чаянии злых,/ но Твоим Боголепным кровом, Дево, обожѣни бывше,/ обретохом радость заутра:/ Ты бо спасла еси нас.

Священномучениче Лаврентие, моли Бога о нас.

Ни на един же день оставити паству твою возмогая, святителю отче Лаврентие, среди искушений и бед, якоже и наставнику твоему Патриарху святому Тихону написав, желая с ним быти на соборе Всеправославном, не остави и нас ныне, яко в Соборе исповедников Всероссийских просиял еси.

Священномучениче Лаврентие, моли Бога о нас.

Егда предтеча антихристов обруши на Церковь клеветов своих, ризы Божественные раздрати тщася, возвысил еси глас архипастырский свой, святителю Лаврентие, в защиту Матере нашея Святыя Церкви, но молитвами твоими избави ю ныне от искушений и бед.

Священномучениче Алексие, моли Бога о нас.

Яко три́е о́троцы, в пещѣ вавилонстей пла́менем объ́ятии, моли́твою не сгара́ху,/ та́ко ты, священномучениче Алексие, во огнь мучѣний благода́тию ве́ру сохрани́л еси́./ Сего́ ра́ди ны́не с новомученики Росси́йскими лику́еши:/ благословѣн еси́, Бо́же отце́в земли́ нашея.

Священномучениче Алексие, моли Бога о нас.

Якоже дре́вле о́троцы, в пещѣ неопалѣеми, злато́му истукáну не поклонѣ́шася,/ та́ко же и ты, священномучениче Алексие, огнем мучѣний неопалѣе́мь,/ безбо́жие небо́язненно облича́л еси́, взыва́я с новомученики Росси́йскими:/ благословѣн еси́, Бо́же отце́в земли́ нашея.

Святы́й мучениче Алексие, моли Бога о нас.

Егда́ земля́ Ру́сская поколебáся грех ра́ди на́ших,/ яви́л еси́ твѣрдое исповѣ́дание ве́ры, Алексие премудре,/ безбо́жия пла́мень уга́шáя.

Святый мучениче Алексие, моли Бога о нас.

Общаго безумия и умов шатания чужд явился еси, мучениче Алексие,/ обаче любовью ко Христу распалаемь,/ твоим страданием обличил еси безбожие.

ПЕСНЬ 8

Ирмос: Отроки благочестивыя в пещи/ Рождество Богорбдичо спасло есть:/ тогда убо образуемое,/ ныне же действуемое,/ вселенную всю воздвизает пети Тебе/ Господа пойте делá/ и превозносите Его во вся веки.

Пресвятая Богородице, спаси нас.

Радуйся, Престоле славный Божий;/ радуйся, верных стенó, Еюже сущим во тьме возсия Свет, Христос,/ Тебе блажащим и вопиющим:/ вся дела Господня, Господа пойте и превозносите во вся веки.

Пресвятая Богородице, спаси нас.

Вся еси Чистая и Божественныя славы исполнена, Ближняя Моя,/ рече Дух Божий, Ты провозвещающая, Пречистая./ Юже песньми воспеваем, поюще:/ тебе подобает радоватися, Бога Человека рождшей.

Священномучениче Лаврентие, моли Бога о нас.

Воистину во всеоружие Божие одет еси, егда за призыв к сему, яко за крамолу некую в темницу беззаконно ввержен был еси, отче Лаврентие, но да изведет Господь молитвами твоими из темницы души наша, присно беззаконнующих на Него.

Священномучениче Лаврентие, моли Бога о нас.

И со беззаконными вменися, но образ Христов и заключенным в темнице, яко благоразумным разбойником, явил еси, яко свеща им бысть светлая в нощи, святителю отче Лаврентие, Богу всыновляя их, в оной же нощи греховной сущих просвети днесь и нас, блудных чад твоих.

Священномучениче Алексие, моли Бога о нас.

Землю Русскую, безбожными гонениями нещадно жегомую,/ слезами и кровью твоими напоил еси, священномучениче Алексие,/ сего ради плоды веры, чада церковная, возрастил еси.

Священномучениче Алексие, моли Бога о нас.

Злобы мучителей не убоялся еси,/ огнём любви Божественныя твоя
препобедив,/ темже благодать молиться о нас стяжал еси,
священномучениче Алексие, достохвальне.

Святой мучениче Алексие, моли Бога о нас.

Егоже отроцы в пещи воспеша,/ Той и ты, страдальче, в пламени
гонений сохрани, взывающа:/ благословен еси, Боже отец наших.

Святой мучениче Алексие, моли Бога о нас.

Слагая в сердце твоём глагол Христов,/ еже не бояться убивающих
тело, души же не могущих убить,/ мужественно на подвиг страдания
потёкл еси, святе, взывая:/ благословен еси, Боже отец наших.

ПЕСНЬ 9

Ирмос: Всяк земнородный/ да възиграется, Духом просвещаем,/ да
торжествует же Безплотных умов естество,/ почитающее священное
торжество Богоматере,/ и да вопиет:/ радуйся, Всеблаженная/ Богородице,
Чистая Приснодево.

Пресвятая Богородице, спаси нас.

Радуйся, Марие, великое вся твари чудо;/ радуйся, Дщи убо
Давидова, Господня же Мати;/ радуйся, пение Гавриилово;/ радуйся,
прибежище и утверждение, и помощь всем, Пресвятая, сущим на земли
грешником.

Пресвятая Богородице, спаси нас.

Радости нам вечныя и жизни явилася еси преестество,
Богородительнице, Ходатаица, Чистая,/ Спаса всех рождающая, от лица
земнаго всяку слезу яве отъемшаго и всем радость подаваго.

Священномучениче Лаврентие, моли Бога о нас.

Аще и не в гору путь от тюрьмы до рекомья «чрезвычайки», но
труден был тебе, яко на Голгофу возшедшему, уподобившемуся Христу
своему.

Священномучениче Лаврентие, моли Бога о нас.

Слезами крестный путь свой оросил еси, отче Лаврентие, вемы же, яко наипаче о народе своем заблудшем печалился еси во образ Господа Иисуса, рекшаго Иерусалиму: «Аще бы ведал еси, что ныне есть ко смирению твоему.»

Священномучениче Алексие, моли Бога о нас.

Рука́ми беззако́нных уби́ен,/ же́ртва благоприя́тная и во́льное заколе́ние Бо́гу принёслся еси́, свя́тче Бо́жий Алексие./ Тем благода́рне па́мять твою́ почита́ем.

Священномучениче Алексие, моли Бога о нас.

Госпо́дь, исполня́я смотре́ние Своё о Це́ркви Ру́сстей,/ засту́пника тя, священномучени́че Алексие, соде́ла./ Те́мже моли́ся Емú, во благоче́стии нам пребыва́ти и спасти́ся душа́м на́шим.

Святы́й мучени́че Алексие, моли Бога о нас.

Сла́ву еди́ному Бо́гу возда́л еси́,/ И́же сла́влящая Его́ прославля́ет,/ те́мже ро́ди ру́сстии тя ублажа́ют,/ мучени́че Алексие приснопа́мятне.

Святы́й мучени́че Алексие, моли Бога о нас.

Страда́ния тво́я и сме́рть мучени́ческая, блаже́нне,/ свиде́тельствоваху любо́вь твою́ ко Христу́, Сы́ну Бо́жию./ Те́мже, ны́не жи́зни ве́чныя наслажда́ясь,/ моли́ся о нас, любо́вию тя прославля́ющих.

СВЕТИЛЕН, свящмч. Лаврентию:

Подвигом своим облекл еси паству твою во всеоружие Божие, имже отразити нам козни лукавого помози, светом же облистался еси нетварным при кончине твоей, священномучениче Лаврентие, оным же светом души наша просвети, да исполнится воля Христова и в нас, чтущих память твою на земли.

СЛАВА, Свящмч. Алексею и мч. Алексею

Тьмы безбо́жия отврати́вшись,/ страда́ния за Христа́ претерпе́ли есте, священномучени́че Алексие и мучени́че Алексие,/ ны́не же во све́лостех святы́х с новомученики ликовству́я,/ моли́те спасти́ и просвети́ти ча́да Це́ркве Ру́сския.

И НЫНЕ, Богородице

Под кров Твой, Дево Госпоже, прибегаем/ вси рóди человечести:/ просвети ны светом Рождества Твоего,/ грешныя рабы Твоя,/ молящияся прилежно и покланяющияся Тебе,/ и просящия умирения мíрови/ и душам нашим велия милости.

НА ХВАЛИТЕХ СТИХИРЫ на 6, Богородице, глас 2

Приидите, возрадуемся державней Заступнице рода нашего,/ Царице Богородице,/ приидите к тихому и чудному Ея Покрóву, веселящеся./ Дарует бо Богородица верным обильныя дáры целебныя/ от неистощимаго источника милости;/ тьмы избавляет нас искушений и бед, и обстояний,/ благочестно и Богоприятно прославляющих и чтущих Ю/ яко Всеблагословенную и Пречистую Матерь Христа Бога./ Темже радостно к Ней воззовем:/ радуйся, палато Слова;/ радуйся, Невесто Невестная;/ радуйся, радости наша;/ радуйся, Мати Живота,/ благословен Плод чрева Твоего.

Радуйся, Всеблагословенная Марие, Мати Христова;/ радуйся, сущая радости всего мира;/ радуйся, Всеблагая Христианом Помощнице;/ радуйся, обидимых Заступнице;/ радуйся, недугующим скорое и известное прибежище;/ радуйся, сирым и вдовицам Божественное утешение;/ радуйся, всех алчущих покрове и Питательнице;/ радуйся, всем сущим в бедáх скорое избавление;/ радуйся, Богоневесто Владычице, упование христиан.

Радуйся, всех христиан надеждо и покрóве, Богомати Всенепорочная,/ всея твари честнѣйшая, Небесных и земных слáвнейшая:/ всех бо родила еси Творца и Бога./ Но, о Владычице, приимí милостивно моления наша/ и спасай нас всегда яко Благая и Милостивая:/ да с веселием лобызаем пресвятую Твою икону/ и присно, радуящеся, восхваляем и величаем Тя,/ Обрадованная Радосте верных раб Твоих.

Святым, глас 4

В реку ввергнута, святе Лаврентие, / реку ты исполнену вод духовных ведяще, / молим истаявшия души наша страстей преступленьми / милостию твоею многою окропи, / и омый сущих во скверне, // и многих избави бед и вечнаго мучения.

Слово Божие воды живыя реки / из чрева верных глаголет истекати, /

подвиги же ваша, святые мученики Лаврентие, Алексие, Алексие, / сподобили вам ризы нетленные исткати / темже образ ваш, яко источник духовный, // егоже струи даны Богом град наш омывати.

Яко огонь и воду прошедша, / и в покой вечный вшедша, / мученики святителю Лаврентие, протоиерею Алексие и Алексие, / со всеми новомученики Российскими, / молитесь умирить Отечество наше и люди, / чтущия любовь святую память вашу.

СЛАВА, глас 8-й:

Князем мучеником древле на холмах, / над землею Низовскою высоко поставленный град / обновляется ныне воистину духом, / имущи над собою новаго небеснаго покровителя, / Епископа Лаврентия священномученика, / по убиении в водную пучину ввергнутаго, / по образу убиеннаго и погребеннаго и во ад спешаго Господа. / Веселися доле стоящая обитель Вознесенская, / горе возноситеся вси верныя нижегородския земли, / возсия бо солнца светлее // память новомучеников и исповедников Российских.

И ныне, глас 6:

Днесь собори верных, / сошедшеся, духовно да торжествуем / и Богоотроковицу Деву и Богородицу / песньми благохвальными ублажим, глаголюще: / радуйся, едина Избранная от всех родов в Матерь Превечнаго Слова; / радуйся, вместилище Невместимаго всеми; / радуйся, Ангелов и Серафимов радости; / радуйся, пророков проповедание и похвало; / радуйся, Апостолов и святителей удобрение; / радуйся, мучеников крепосте и всех праведных славо; / радуйся, державный покрове верных; / радуйся, скорбящих Божественное утешение; / радуйся, в бедах и напастьх сущим скорое избавление; / радуйся, грешников всех прибежище и Благая Заступнице; / радуйся, Благодатная и Обрадованная, с Тобою Господь, / подай миру Тобою велию милость.

НА ЛИТУРГИИ

Прокимен Богородице и святым, глас 7-й: Возвеселится праведник о Господе / и уповает на Него.

Стих: Услыши Боже глас мой, внегда молитимся к Тебе.

Апостол Богородице и святым ко Евреям, зач. 335.

Аллилуйя, глас 4-й: Священницы Твои облакутся в правду и преподобнии Твои возрадуются.

Евангелие Богородице и святым от Иоанна, зач. 52.

Тропарь Богородице, глас 2:

**Всех скорбящих Радосте,/ и обидимых Заступнице,/ и алчущих
Питательнице,/ странных утешение,/ обуреваемых пристанище,
больных посещение,/ немощных покрове и Заступнице,/ жёзле
старости,/ Мати Бога Вышняго Ты еси, Пречистая:/ потщися,
молимся, спастися рабом Твоим.**

ТРОПАРЬ свящмч. Лаврентию, глас 4-й.

**Святительства благодатью украшенный, / ни на един же день
оставити паству свою восхотел еси, / юже вручи тебе
Пастыреначальник Христос, / Емуже до уз темничных и смерти, взял
крест, последовал еси, / венцем мученическим на небесах венчался
еси, / священномучениче Лаврентие отче наш, // моли Христа Бога
спастися душам нашим.**

Тропарь свящмч. Алексею и мч. Алексею, глас 3:

**Цёркве Рýсския столпи непоколебímии,/ благочéстия прáвило,
жити́я ева́нгельскаго о́бразе,/ священномúчениче Алексие и мучениче
Алексие,/ Христа́ ра́ди пострада́вший да́же до кро́ве,/ Егóже моли́те
усérдно,/ я́ко Нача́льника и Соверши́теля спасéния,/ Русь Святúю
утверди́ти в Правосла́вии// до сконча́ния ве́ка.**

Кондак Богородице, глас 4:

**Не íмамы иныя помощи,/ не íмамы иныя надежды,/ разве Тебе,
Владычице./ Ты нам помози́:/ на Тебе надеемся и Тобою хвалимся,
Твои бо есмы раби,/ да не постыдимся.**

КОНДАК свящмч. Лаврентию, глас 3-й:

**В годину трудную и скорбную крест свой не оставляя нес, / егоже
вручи тебе Пастыреначальник Христос, / Емуже до темницы и
смерти последовал еси, / венцем мученическим на небесах венчался
еси, / Священномучениче Лаврентие отче наш, / молися Пресвятой
Троице / паству Нижегородскую в правоверии соблюсти // и обитель
твою Печерскую сохранить даже до скончания века.**

Конда́к свящмч. Алексею и мученику Алексею, глас 2:

Восхва́лим, ве́рнии,/ изря́днаго во свяще́нниках Алекси́а/ и сла́внаго в му́ченицах Алекси́а,/ Правосла́вия поборо́нников и благоче́стия ревни́телей,/ земли́ Ру́сская красное прозябе́ние,/ иже страда́нием Небесе́ дости́же/ и та́мо те́пле мо́лят Христа́ Бо́га// спасти́ся душа́м на́шим.

ВЕЛИЧАНИЕ

Достойно есть величати Тя,/ Богородице,/ честнейшую Херувим/ и славнейшую/ без сравнения Серафим.

Величаем, величаем Тя, священномучениче отче Лаврентие, и чтим святую память Твою, Ты бо молиши за нас Христа Бога нашего.

Велича́ем вас,/ священному́ченицы Лаврентие, Алексие и мучениче Алексие,/ и чтим честна́я страда́ния ваша,/ яже за Христа́ во утвержде́ние на Руси́ Правосла́вия// претерпе́ли есте.

Молитва Божией Матери пред Ея иконой« Всех скорбящих Радость»

О, Пресвятая Владычице Богородице, Вышшая Херувим и Честнейшая Серафим, Богоизбранная Отроковице, всех скорбящих Радосте! Подаждь утешение и нам, в скорби сущим: разве бо Тебе инаго прибежища и помощи не имамы. Ты Едина еси радости наша Ходатаица, и яко Мать Божия и Мати милосердия, предстоящи у Престола Пресвятыя Троицы, можеши нам помощи: никтоже бо притекаяй к Тебе посрамлен отходит. Услыши убо и нас, ныне в день скорби пред Твоею иконою припадающих и со слезами Тебе молящихся: отжени от наслежащая на нас скорби и печали в сей временней жизни, не лишены же ны сотвори Твоим всеильным ходатайством и вечныя нескончаемыя радости в Царствии Сына Твоего и Бога нашего. Аминь.

МОЛИТВА священномученику Лаврентию Балахнинскому

Мучениче святой, епископе Лаврентие! Молим тя мы, недостойные чады твои, на грешней и многострадальной земле Российской пребывающие, на коей и ты страдания и мучения претерпел еси ради Христа Бога нашего! Спаси души наша, утверди души наша во спасительных делах. Моли Господа Бога нашего удалить от нас искушения мира сего грешного, моли Его даровати нам силы и обстояния для исполнения заповедей Его и повелений! Молим тя, святой мучениче

Лаврентие, помощи во спасении душ и телес наших, сродников наших и всех христиан Российских.

МОЛИТВА священномученику Алексию и мученику Алексию

О, избранницы и угодницы Христовы, священномучениче Алексие и мучениче Алексие, Церкви Русския столпи непоколебимии, земли нашей благое прозябение и красный плод, сродников ваших предстатели и наставницы! Вы во время гонения безбожного от сокровищниц душ ваших спасительное исповедание Православныя веры изнесли есте, и людем верным пастыри добрии явились есте, души ваша за Христа и Его овцы полагая и лютыя волки далече отгоняя. Ныне убо призрите на нас, недостойных чад ваших, умиленною душею и сокрушенным сердцем вас призывающих. Умолите Господа Бога, да простит согрешения наша и избавит от адовых уз и вечнаго мучения. Утвердите нас в вере святей, научите нас всегда творить волю Божию и хранить заповеди церковныя. Будете пастырем нашим правило веры, воином вожди духовнии, болящим врачю изряднии, печальным утешителие, гонимым заступницы, юным наставницы, всем же благосердии и теплии молитвенницы, яко да молитвами вашими соблюдется в Православии Святая Русь и непрестанно славится в ней имя Пресвятыя Троицы, Отца, и Сына, и Святаго Духа, во веки веков. Аминь.